



PRIMLJENO: 13-06-2024			
Organizaciona jedinica	Klasifikaciona oznaka	Redni broj	Broj prilog
01-	01-	1019/24	

2

PRIJEDLOG

Na osnovu člana X. 1. Ustava Bosne i Hercegovine, Parlamentarna skupština Bosne i Hercegovine, na __. sjednici Predstavničkog doma, održanoj __. __. 2024. godine, i na __. sjednici Doma naroda, održanoj __. __. 2024. godine, donijela je

AMANDMAN II.

NA USTAV BOSNE I HERCEGOVINE

U Ustavu Bosne i Hercegovine u članu VI. „Ustavni sud“ u stavu 1. „Sastav“ u tački a) na početku teksta dodaju se riječi: „Na prijedlog Visokog sudskog i tužilačkog vijeća Bosne i Hercegovine“.

Amandman II. na Ustav Bosne i Hercegovine stupa na snagu osmog dana od dana objavljivanja u „Službenom glasniku BiH“.

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

O B R A Z L O Ž E N J E

I. USTAVNI OSNOV ZA USVAJANJE AMANDMANA

Ustavni osnov za usvajanje amandmana na Ustav Bosne i Hercegovine sadržan je u članu X. 1. Ustava Bosne i Hercegovine, koji glasi: „Ovaj ustav može biti mijenjan i dopunjavan odlukom Parlamentarne skupštine, koja uključuje dvotrećinsku većinu prisutnih i koji su glasali u Predstavničkom domu.“

II. RAZLOZI ZA USVAJANJE AMANDMANA

Sastav Ustavnog suda Bosne i Hercegovine i način izbora sudija propisani su, u prvom redu, Ustavom Bosne i Hercegovine. Tako je članom VI. stav 1. tačka a) Ustava Bosne i Hercegovine propisano da se Ustavni sud Bosne i Hercegovine sastoji od devet članova, od kojih četiri člana bira Predstavnički dom Parlamenta Federacije Bosne i Hercegovine, a dva člana Narodna skupština Republike Srpske. Preostala tri člana bira predsjednik Evropskog suda za ljudska prava nakon konsultacije s Predsjedništvom Bosne i Hercegovine.

Kada je riječ o kriterijima koje sudije moraju ispunjavati, članom VI. stav 1. tačka b) Ustava Bosne i Hercegovine propisano je: „sudije će biti istaknuti pravnici visokog moralnog ugleda“. Svako ko udovoljava takvoj kvalifikaciji i ima pravo glasa može biti imenovan za sudiju Ustavnog suda. Sudije koje bira predsjednik Evropskog suda za ljudska prava ne mogu biti državljani Bosne i Hercegovine ili bilo koje susjedne države.

Osim toga, članom 96. (Nespojivost funkcije) Pravila Ustavnog suda Bosne i Hercegovine („Službeni glasnik BiH“, br. 94/14 i 47/23) propisano je da je funkcija sudije nespojiva s članstvom u političkoj stranci ili političkoj organizaciji u Bosni i Hercegovini. Također, spomenutim članom je, između ostalog, propisano da se javnom odnosno profesionalnom dužnošću ne smatra ni druga naučna i stručna djelatnost niti člansko djelovanje u institutima i udruženjima pravnika, kao ni u humanitarnim, kulturnim, sportskim i drugim udruženjima, osim ako te aktivnosti nisu u vezi s radom neke političke stranke.

Usvajanjem amandmana omogućilo bi se da prevashodno struka, Visoko sudsko i tužilačko vijeće Bosne i Hercegovine, predlaže imenovanje sudija Ustavnog suda Bosne i Hercegovine odnosno da daje prijedloge nadležnim organima u vezi sa izborom i imenovanjem sudija Ustavnog suda Bosne i Hercegovine.

Naime, kako je dosadašnja praksa potvrdila, jedan broj do sada istaknutih kandidata obavljali su stranačke ili političke funkcije.

Također, predloženim amandmanom omogućava se uživanje prava i sloboda propisanih Ustavom Bosne i Hercegovine, Evropskom konvencijom o ljudskim pravima i osnovnim slobodama i njenim protoklima te zakonima Bosne i Hercegovine, koje mora biti osigurano svim licima u Bosni i Hercegovini bez diskriminacije po bilo kojem osnovu kao što su pripadnost političkim subjektima ili njihova neskrivena podrška, spol, rasa, boja, jezik, vjera,

političko i drugo mišljenje, nacionalno ili socijalno porijeklo, povezanost s nacionalnom manjinom, imovina, rođenje ili drugi status.

Na kraju, ovim amandmanom izbjegla bi se apsurdna situacija da sudije Ustavnog suda Bosne i Hercegovine predlaže parlamentarna komisija koju čine politički imenovana lica, koja po svojim kvalifikacijama i obrazovanju često nisu u mogućnosti adekvatno i stručno procijeniti kvalifikacije kandidata kao istaknutih pravnika.

III. PRINCIPI NA KOJIMA JE ZASNOVAN PRIJEDLOG AMANDMANA

Ovaj prijedlog amandmana zasnovan je na principima ustavnosti, transparentnosti, stručnosti i kompetenciji sudija koji zastupaju principe ustavnosti.

IV. PROCJENA FINANSIJSKIH SREDSTAVA NEOPHODNIH ZA PROVOĐENJE AMANDMANA

Za provođenje ovog amandmana nije potrebno osigurati dodatna finansijska sredstva u budžetu institucija Bosne i Hercegovine.